



DISCOVERS DE L'ORIGINE ET PROPRIETEZ de la Fontaine minérale DE POUGVES.

Par M. ESTIENNE FLAMIN,
*Conseiller Médecin du Roy, & Intendant
des eaux dudit Pougues.*



A PARIS, 30297
De l'Imprimerie de PIERRE DVRAND,
au Mont saint Hilaire proche le
puits-Certain.





A

MONSIEVR,

MONSIEVR BOVVARD,


CONSEILLER DV ROY EN
 ses Conseils d'Estat, & Priué, son
 premier Medecin, & Surintendant
 general des eaus minerales de
 France.



MONSIEVR,

Ce n'est pas assez au Pilo-
 te, qui s'expose à la mercy des ondes pour
 faire vn voyage loingtain, d'auoir fait choix
 d'un vent qui luy soit fauorable, ny bien sceu
 conduire son vaisseau par l'ayde de sa bous-
 sole, si estant proche du port plein d'escueils, il

à ii



n'a encor vu guide ou phare, à la faueur duquel il y puisse arriuer heureusement, ainsi Monsieur, puis que ce petit discours est si ose, que d'entreprendre de se faire voir au iour & se commettre au peril de la mer des diferentes opinions & iugemens de ce siecle, ce neluy est pas assez de publier les vertus & proprieteZ singulieres des eaux de Pougues, ny de rendre raison par la cognoissance de la Medecine, de leurs merueilleuses guerisons, il à besoin encor d'un sage pere, qui le conseille, d'un fidelle conducteur qui le mette au bon chemin, & d'un sçauant Maistre qui l'enseigne & le corrige; Or Monsieur, à qui se pourroit-il mieux adresser qu'à vous, qui auez entre autres, ces trois qualitez, de sage, de fidelle, & de sçauant Medecin, avec vne telle eminence pardessus les autres, que ie peux dire, sans flatterie (non peut estre sans enuie) qu'elles vous rendent en nos iours non seulement la lumiere de la Medecine, mais encor la gloire & l'honneur mesme des

Medecins, aussi la France louë Dieu tous
 les iours, admirant la grande prudence de
 nostre Roy tres-Chrestien, d'auoir de son
 seul mouuement & comme par vne inspira-
 tion diuine, ietté l'œil sur vous pour la con-
 duite & conseruation de sa santé, & en el-
 le de celle de son estar. Je vous supplie donc
 tres-humblement, Monsieur, d'auoir pour
 agreable que sous vostre faueur, i'expose en
 veuë ce mien petit labeur, & que vostre nom
 autant chery & reueré de nostre temps,
 que la esté i'adis celuy d'Hesculape de l'an-
 tiquité, luy soit ce rameau d'or de la sibylle,
 lequel malgré l'enuie & la mesdisance, le
 conduise seurement au seul but qu'il à de
 profiter au public; vn grand Roy n'a pas au-
 tres fois desdaigné de receuoir vn peu d'eaus
 commune, à cause de la franchise de celuy
 qui la luy presentoit, vostre courtoisie aussi
 me fait esperer, que vous agrerez l'offre
 que ie vous fais de cette fontaine entiere,
 fontaine disie, mais si salutaire, que nos

Royz l'ont tousiours honorée de leurs presences & seiours, y ayans recouuert la santé, laquelle ils auoient perduë, ce qui les à mises en telle recommandation enuers leurs successeurs qu'ils n'ont iamais donné la surintendance d'icelles, sinon à ceux, ausquels ils confient la santé de leurs sacrees personnes, comme à vous Monsieur, qui vous en acquitez aussi si dignement & apportez tant de soing & de vigilance à faire entretenir ces eaux si diuines, & reformer les abus, qui s'y commettent, que i'ay tort de douter que vous ne protegiez avec cette fontaine, ce liuret qui publie ses merueilles; Que s'il ne vous à porté autant de satisfaction en vostre particulier, & au public autant d'vtilité que ie le desire, au moins faisant voir, que le thresor de la vie fait son sejour dās les boüillons de la fontaine de Pougues, il donnera tesmoignage que i'ay eu l'intention de le faire & que i'y ay esté obligé par le deub de la charge de vostre sous intendant, en laquelle

il vous pleust me nommer, lors qu'au camp de la Rochelle, vous me fistes aggreer à sa Maiesté, pour Medecin de son Artillerie, faueurs, lesquelles me sont encor si presentes, que ie me rendrois coupable d'ingratitude, si ie ne vous faisois cognoistre les resentimens qu'en a celuy qui se tiendra tres-heureux de se qualifier toute sa vie.

MONSIEVR,

Vostre tres-humble & tres-obligé
seruiteur.

E. FLAMANT



Sur le liure de Monsieur Flamen Conseiller
Medecin du Roy , & Intendant des
eaux de Pougues.

S O N N E T.

E A V S, source de santé, le plus utile ouvrage,
Que nature ait éclos de son entendement,
Quand de trois Element, elle à faiët l'Element
Où la vie prend port, & la mort fait naufrage.

Le Ciel ne pouuoit pas donner vn meilleur gage
Aux hommes maladifs, pour leur soulagement
Ny choisir autre esprit que celuy de FLAMENT
Pour leur en deceler les vertus & l'usage.


Ses escrits en font foy, vrays & doctes Oracles
Qui declarent si bien vostre estre, & vos miracles,
Que si ce grãd BOVVARD, daigney ietter les yeux,

Il le confirmera vostre unique Neptune
Et ne lairra pourtant d'accuser la fortune,
De ne luy offrir pas, de quoy luy faire mieux.

Par son tres humble Seruiteur, &
Confrere. I. D V P V Y. Conseiller
& premier Medecin de son Altesse
Serenissime de Mantouë.



DISCOURS
de l'Origine & proprietez de la
Fontaine minerale de
Pougues.



EAU (dit Pindare) est vne chose tres-excellente & tres-bonne, entre toutes celles qui sont creées pour l'usage de l'homme, n'y en ayant aucune plus necessaire. La diuine prouidence en a mis aux sommets des montagnes, aux vallées, au plat país; bref en tous lieux de la terre, afin que l'homme se logeant (à sa fantasie) en quelque vn d'iceux, y trouuast cet element propice & fauorable, sans lequel il ne peut viure, mouuoir, ny respirer. Car l'eau n'est pas seulement necessaire à l'entretien & nourriture de l'homme, pour ce qui concerne le dehors, mais aussi pour le dedans, à raison de sa composition. Estant chose tres-assurée que l'humide radical

seroit bien tost absorbé par la chaleur elementaire, differente de la naturelle, selon l'opinion d'Aristote suiuite par Fernel, s'il n'auoit pour bouclier & defense la qualité humide de l'eau, contre laquelle elle agit continuellement durant tout le cours de la vie.

Or puis qu'ainsi est que l'eau est vn element si necessaire à la vie de l'homme, il faut cognoistre pour l'usage d'icelle quelles qualitez elle doit auoir. Ce que Galien nous a enseigné au premier liure de la faculté des medicaments simples, lors qu'il a distingué l'eau pure d'auec l'impure; disant que la pure se cognoist par le goust, par la veüe, & par l'odorat. C'est à dire, qu'elle doit estre claire, limpide, qu'elle ne doit auoir ny goust, ny odeur, ny saueur quelconque. Il passe plus outre au mesme liure, & dit que l'eau sert aux sains & aux malades, que d'icelle on fait medicaments & aliments, selon l'intention de celuy qui s'en veut seruir. Sur quoy nous pouuons librement, & asseurement cōclure, qu'en-

core que Galien, Hippocrate, & autres Medecins nous ayent baillé si grād nombre de signes, pour cognoistre l'eau pure d'auec l'impure : ils n'ont pourtant reprouué l'vsage de celle qui est impure & meslangée, d'autant que si elle ne sert à ceux qui sont en parfaicte santé, elle peut seruir à ceux qui sont malades, ou en estat neutre, cōme nous ont laissé par escrit tāt de grands hommes, qui ont fait des volumes entiers des eaüs impures & meslangées, & de la diuersité d'icelles, laquelle est si grāde qu'il faudroit la vie entiere de l'homme pour en faire la description.

Il se trouue vn grand nombre de fontaines impures & mixtes par le meslange des mineraux, & excrements d'iceux en Italie. L'Alemagne n'en manque pas. Le Liege nous fournit celles de Spa. La France en est remplie, & tous les iours on en descouure de nouuelles, mais de diuerses qualitez, temperaments, & effects, plus ou moins differents, selon le meslange desdits mineraux, par lesquelles elles pas-

sent, & selon la faueur que la nature, par vne prouidence particuliere, a fait à quelques vnes plus qu'à d'autres, les ayant doüées de proprietez & vertus si rares, qu'elles nous rauissent en admiration. Entr'autres nous en remarquons en France de tres-renommées, qui sont celles des deux Bourbons, Archambault, & Lancy, & celles de Pougues, lesquelles encore qu'elles ne soient pas beaucoup distantes les vnes des autres, neantmoins elles sont de differentes qualitez, effets & temperaments, les vnes estants froides actuellement, & les autres chaudes.

Il y a peu de personnes en France qui n'ayent oüy parler des merueilleux effets des eaüx de Pougues. Le bruit en est si grand, que par années communes on y pourroit compter cinq ou six cens personnes, qui pour en boire viennent de loingtains païs, avec intention d'y trouver guerison à leurs infirmittez. De tous ceux qui s'y acheminent on n'en voit retourner aucun, qui n'en remporte, sinon

vnne parfaicte santé, à tout le moins vn grand allegement. Combien en void on amener dans des brancards tous pérclus, & paralytiques, lesquels apres auoir beu douze ou quinze iours desdites eaües, s'en retournent bien gueris, & remis en leur premiere santé. Le Poictou, & la Bretaigne en rendront tousiours des tesmoignages tres-veritables, pour les rares & singulieres guerisons, que plusieurs habitants de ces Prouinces en remportent par chascun an.

Auant que passer outre à la description des proprietéz de ces eaües de Pougues, ie diray en peu de paroles quelque chose de leur source, faueur, odeur, & autres qualitez.

La Fontaine dont rejaillit cette eau si salubre, est située au dessous du bourg de Pougues, distant de deux lieuës de Neuers. Elle fluë & boüillonne continuellement. Au goust elle est adstringente & acide, & semblable à l'eau dans laquelle on auroit destrempé du vitriol, claire tou-

resfois & nette comme l'eau pure, estant froide l'esté, & l'hyuer chaude.

Plusieurs doctes & sçauants Medecins apres s'estrelóg tempstrauallez l'esprit à rechercher la cause & origine de ceste eau, tant par la distillation, ebullition, que de position & sediment d'icelle, ont creu qu'elle passoit par des mines de fer, dans lesquelles il y auoit quantité de vitriol, & quelque peu d'alun, induits à le croire par son adstriction, & saueur acide penetran-
te. Et de vray pour plus grande confir-
mation de leur dire, nous qui practiquós sur les lieux, remarquons tous les iours que la plus grande partie de ces effets pro-
cede de l'impression minerale qu'elle prend en passant par lesdites mines, chascune desquelles â des proprietéz particu-
lieres.

Le fer est doüé de faculté corroboratiue, desiccatiue & adstringente.

L'Alun a vne insigne adstriction & penetration, sans laquelle l'adstriction ne seruiroit de rien.

La nature a donné au vitriol des excellentes & rares proprietez que nous pouvons recueillir par les escrits de Dioscoride, Galien, & autres. Tous lesquels disent qu'il est chaud, adstringent & desiccatif, qu'il empesche la pourriture, qu'il consomme les serositez superflues & nuisibles, qu'il fait mourir les vers du ventre, & qu'il fortifie merueilleusement les parties interieures du corps.

Ceste eau retient encores quelque impression du soulfhre, outre celle du fer, de l'alun, & du vitriol, qui luy communique vne qualite vaporeuse, comme il paroist à l'odorat & au goust de ceux qui en boient. En outre les Alchimistes tiennent que les mines de vitriol sont tousjours meslangées de soulfhre, lequel ils separent du vitriol par le moyen du feu.

Il me souuient d'auoir vſé cy-dessus du mot d'*impression minerale*. Ce qui pourroit peut-estre exciter quelque doute aux curieux, comment les caüs retiennent la vertu, la saueur, odeur, & autres qualitez

des minéraux, par où elles passent, & si elles tirent quelque chose avec soy de leur solidité.

Pour lequel esclaircir, il cōtient sçauoir qu'il y a vne nature generale de tous les metaux, ou pour mieux dire vertu originelle appellée par Albert minerale, laquelle agit en la production de tous les metaux, comme la vertu formatiue agit en la semence. Mais d'autant que ie n'ay entrepris de parler des metaux que pour faire voir comment ils impriment leurs qualitez dans les eaüs, ie ne m'estendray plus auant sur iceux, les laissant aux Alchimistes qui en sont idolatres, & me contenteray de dire seulement que trois choses sont requises à ladite production, la vapeur ou exhalaison des corps metalliques, la matiere dont se forment les metaux, & la terre cōmune qui les contient; lesquelles n'estants encore totalement coagulées en vray metal, communiquent aux eaüs leurs susdites impressions minerales.

Si donc les minéraux par lesquels passent

sent les eaüs de Pougues , ont de si rares & vtilles qualitez , pourquoy s'estonnera-on quand on leur verra produire des effets si admirables , & si par le moyen de l'impression qu'elles prennent d'iceux elles emportent bien souuent plusieurs maladies deplorées ? Estant chose très-assurée, que leurs facultez suiuent leur essence, & leur essence leur meslange. En sorte que nous pouuons dire assurément que leides eaüs par leurs qualitez penetrent toutes les parties du corps & conduits qui sont en iceluy ; elles conseruent l'œconomie naturelle, & entretiennent l'harmonie de la santé, & chassent les humeurs grossieres & terrestres de tout nôstre corps.

Encores que personne n'ignore que les effets susmentionnées ne soient proportionnez à la qualité, qu'on attribue à ladite eau minerale, & que celuy qui le voudroit nier seroit plustost estimé malin que iudicieux ; si est-ce neantmoins que ie ne laisseray d'en escrire ce petit mot, tât pour m'aquiter du deuoir de ma charge, que

pour faire voir à l'œil & toucher au doigt (comme l'on dit) quelle vtilité en peuvent retirer ceux qui esloignez dudit lieu en voudroient boire. C'est pourquoy i'ay creu qu'il estoit à propos de faire voir plus particulièrement à quelles maladies lesdites caus sont propres, ou pour mieux dire de quelles maladies elles font la destruction. I'essayeray de les estaller, sinon toutes, à tout le moins quelques-vnes que i'ay remarquées depuis vingt-fix ans, que ie frequente ledit lieu de Pougues, sans nommer personne; tant pour éviter prolixité, que pour n'offenser ceux qui seroient peut-estre interessez dans le rencontre de quelques-vnes desdites maladies.

L'une des premieres & principales causes des maladies, qui attaquent le corps humain, c'est la crudité du ventricule, laquelle est appelée par Auicenne, la mere de tous les maux. Et non sans raison. Car si le ventricule ne fournit vn chylè loüable & bon au foye, cōment voulez vous que ledit foye conuertisse en bon sang l'a-

liment mal élaboré en sa premiere coction, & le rende propre à l'entretien de la complexion & integrite de chascune partie dudit corps? Estant chose tres asseurée, que la distribution du mauuais sang peruertit l'œconomie naturelle.

Ladite crudité procede d'intemperie chaude ou froide, avec matiere ou sans matiere. La matiere est ou bile acre & mordicante, ou bien vne espee de pituite visqueuse, ou humeur melancholique. Pour toutes ces causes nous faisons vsr des susdites eaus, avec heureux succès. Car si quelqu'un â l'estomac refroidi par la presence d'une pituite visqueuse adherente à ses tuniques, ces eaus apres l auoir détachée & repoulsée dans les intestins par le pylore ou orifice inferieur, elles le fortifient, confortent & disposent à bien & deuëment faire son deuoir; si au contraire, il est échauffé par la presence de quelque bile, apres l'en auoir dégagé par leur faculté absterfiue, elles remettent ladite partie en son premier temperament.

Le foye est quelquefois si chaud, qu'il brusle & consomme le chyle, quoy que loüable auparauant, & engendre vne si grande quantité de bile, que portée dans les veines, elle fait des fièvres tierces & ardentes. Si par hazard elle refluë à l'orifice superieur de l'estomach, l'vne des plus sensibles parties de tout nostre corps, à cause de sa composition membraneuse & nerveuse, elle excite des cardiogmes, & cardialgies, & quelquefois la maladie que nous appellons cholera, que les Medecins mettent au rang des plus aiguës. Si elle se porte au cuir, elle fait des pustules, herpes, crysipeles & demangeaisons. A toutes ces maladies qui en causent vne infinité d'autres, nous auons trouué pour souuerain alexitere l'vsage desdites caüs, lesquelles par leur qualité rafraischissante temperent l'ardeur du foye, & le disposent à faire vn sang propre à la nourriture.

Pour passer plus auant, & en peu de mots satisfaire à ce que i'ay promis cy-dessus, ie me suis aduisé de faire vne succincte

& superficielle description de l'action de chacune partie, ou à tout le moins des principales du ventre inferieur. Le ventricule ayant conuerty & changé en chyle l'aliment, qu'il a receu de la bouche par l'œsophage, il l'enuoye au foye par les veines mesaraïques; la chaleur duquel se peut dire analogue, & proportionnée à celle du soleil. Car comme le soleil agit diuersement sur les corps sublunaires, liquéfiant la cire, & endurcissant la fange. Ainsi la chaleur du foye separant les parties heterogenées du chyle d'auec les homogenées, enuoye la bile & la melâcholie chacune en son alucole & receptacle, comme inutile à la nourriture des parties; la bile dans le *cystis fellis*, ou vescie du fiel, pour de là estre portée dás les intestins par le meat cholidoque, afin qu'irritant le sphincter elle serue à l'expulsion des excrements, qui par leur demeure causeroient de mauuaises vapeurs au cœur & au cerueau. La melancholie, ou pour mieux dire le sang melancholique est enuoyé dans la ratte, de la-

quelle apres en auoir prins la partie la plus subtile pour sa nourritute , elle enuoye vne portion dans le fonds du ventricule, par le canal qu'on appelle *vas breue*, pour exciter l'appetit, & l'autre qui est la plus crasse dans les veines hemorrhoidales.

Le foye bien temperé ayant separé ces deux excremens sus-nommez, enuoye le sang purifié aux parties superieures par le rameau de la veine caue ascendente, & aux inferieures par celui de la descendente, & en fournit les parties voisines par les rejettons de la veine porte. Si la moindre desdites parties manque à faire le deuoir & office auquel elle est commise, les veines se remplissent d'impuretez, d'où s'ensuit vne confusion totale de l'œconomie naturelle. Ce qui ne peut arriuer, que par trois vices, qui sont, ou obstruction, ou desiccation, ou inflammation. Si c'est par obstruction, qui doute que lesdites caüs par leur qualité incisive, aperitiue, & detersiue n'incisent & attenuent les humeurs tant crasses & terrestres qu'elles soient ? Si c'est

par desiccation ou inflammation, la qualité euidente & manifeste desdites eaüs y est diametralement opposée. Car elles humectent les parties deséchées, & rafraichissent les parties eschauffées outre mesure, comme nous fait voir l'experience journaliere. D'autant que pour l'ordinaire, la desiccation est causée par vne chaleur estrangere, laquelle comme marastre consumant leur humidité les laisse à sec. Qui fait que ceste eau estant portée en quantité ausdites parties par le moyen de la vertu minerale qui luy sert de vehicule, rabat la susdite chaleur, & chasse la siccité, introduisant de nouueau l'humidité requise à la santé.

Les reins sont empeschez en leur office, qui est de succer les serositez de la veine caue par le ministere des emulgentes, ou par inflammation, ou par vlcere, ou par obstruction. Qui ne sçait que lesdites eaüs rafraichissent, temperent, esteignent, & amortissent les chaleurs excessiues de toutes les parties de nostre corps? Elles deter-

gent, nettoient & mondifient, & de plus par leur qualité incisive & aperitive, ouvrent les passages, & rendent la liberté à tous les côduits & meats de nôtre corps. Tellement que si l'obstruction se fait par quelque phlegme tenace & adherent, elles le destachent & euacuent. Si c'est par quelque pierre, elles la chassent violemment avec les sables, & autres corps qui se rencontrent, par le moyen du grand flux d'urine qu'elles excitent.

Que si par malheur les pierres sont de telle grosseur, qu'elles ne puissent plus sortir, l'usage de ladite eau empesche, du moins, leur accroissement, & dispose celles de la vescie à estre tirées par incision. Ce qui se fait tous les ans en ce païs en vne infinité de personnes, par Maistre Charles Collot, Operateur tres-excellent, qui outre sa rare capacité à l'extraction desdites pierres, semble encores avoir quelque don particulier de Dieu, qui le rend si heureux, que nous ne voyons point arriuer faute de ceux ausquels il la tire, de quelque âge sexe qu'ils soient.

Je serois grandement à blasmer, si ie mettois en oubly les belles cures qu'elles font sur ceux, qui sans sujet sont en continuelle crainte & tristesse, iugez melancholiques par Hyppocrate. D'autant que de vingt personnes qui viennent à Pougues, il y en a quinze de ceste sorte, lesquels apres auoir beu vn mois ou enuiron desdites eaüs, s'en retournent deschargez de toutes leurs imaginations illusoires, & chimeriques, & nō sans raison. Car comme dit le mesme Hyppocrate, qui humecte les melancholiques les guerit. De plus lesdites eaüs, par leur impression minérale, font couler les humeurs crasses & terrestres de la ratte, qui retenuës en icelle leur alterent tellement l'esprit, que (l'imaginatiue blessée) il leur vient en dormant des songes tous diuers, & en peu de temps, les vns terribles & espouventables, les autres facetieux & ridicules, le tout avec crainte & tristesse. D'autant que la vapeur melancholique noire & obscure, s'esleuant iusques aux ventricules du cerueau (siege

des principales facultez de l'ame) leur excite vne peur & tristesse, de mesme façon que la clairté & splendeur de la lumiere excite vne ioye & assurance. l'ay quelquefois admiré avec compassion le grand deuoyement de leur esprit, durant l'vsage desdites eaüs, & à leur départ ie me suis resioüy les voyant reestablis dans leur bon iugement.

l'ay dit cy-dessus, que la ratte enuoyoit la partie la plus crasse du sang melancholique dans les veines hemorrhoidales. Laquelle action bien qu'elle soit louable de foy, & qu'elle procede de la nature, se rend neantmoins si maladiue par l'irritation de la quantité ou qualité de ce sang grossier & feculent, qu'elle fait vne maladie que nous appellons les *hemorrhoides*, laquelle outre les grandes douleurs qu'elle excite à ceux qui en sont incommodéz, laisse encores le plus souuent des vlcères malins, & presque incurables; & ce qui est encores de plus fascheux en cetteditte maladie, c'est que les Medecins mettent

en doute, s'il est bon de la guerir ou non. C'est chose tres-assurée que le foye n'estant nettoyé de l'humeur terrestre & melancholique par la ratte, & la ratte par les veines hemorrhoidales, qu'infailiblement il faut qu'il en arriue déplaisir à quelque vne des autres parties du corps. Mais l'usage de quinze ou vingt iours de l'eau de Pougues fait cesser cet accident. D'autant que guerissant ceste maladie, elle corrige l'intemperie du foye & de la ratte par le moyen dequoy elle empesche la generation de cesteumeur terrestre & cacochyme. Et non seulement elle guerit les hemorrhoides, mais aussi toute sorte d'ulceres qui en prouiennent, tant malins soient-ils.

Beaucoup de Dames de France, & de maisons signalées, ont grande obligation ausdites eaus, lesquelles apres auoir esté longues années avec leurs maris sans auoir lignée, leur ont tellement disposé les vaisseaux de la generation, qu'à la premiere rencontre qu'elles ont eu avec leursdits

maris, ont conceu & engendré de beaux enfans.

La generation est empeschée pour plusieurs raisons, aux femmes principalement; ou par trop grande chaleur, ou humidité ou siccité. Et à ces trois empeschemens lesdites caüs remedient. Comme aussi si elles sont incommodées par vne trop grande suppression de leurs mois, ou au contraire trop grand flux d'iceux, qu'elles en beuent hardiment, & s'asseurent que par l'vsage desdites caüs elles receuront du soulagement, pour l'un & pour l'autre. Pour la suppression, d'autant que elles penetrent, attenuent les humeurs, & reduisent en petites parties ce qu'elles trouuent d'estrange aux conduits par où elles passent, & le chassent dehors. Pour le trop grand flux, qui ne sçait que pour l'ordinaire la cause en est vne quantité de sang ou trop chaud, ou trop subtil, ou trop acre & mordicant, qui non seulement se fait chemin par anastomose, mais aussi quelques fois par rupture des veines?

Lequel est arresté par lescites eaus, d'autant qu'elles rafraichissent le foye, temperent l'acrimonie du sang, & par leur adstriction ou ferrumination révnissent les parties separées.

Bien que ie n'aye entrepris de rapporter icy toutes les maladies, qui se guerissent par l'usage de ces eaus (ne le pouuant ny desirant faire, pour éviter l'ennuy que j'apporterois au Lecteur) neantmoins ie croyrois auoir failly, si en suite ie ne parlois d'une maladie assez coustumiere aux filles, qui ont atteint l'âge de puberté, & aux ieunes vesues. Ceste maladie appelée, *les pasles couleurs*, laquelle leur apporte tât d'incommoditez, qu'elle semble estre vn abregé d'une infinité d'autres. Le premier & plus frequent symptome qu'elle leur excite, est vne auersion contre les bons aliments, au lieu desquels elle leur en fait desirer & vser de tous contraires au restablissement de la deperdition de l'humeur substantielle, qui se fait continuellement. Delà vient que le chyle estant mauuais, le

sang ne peut estre bon; qui en ceste sorte transporté par toutes les parties du corps, les rend languides, & incapables de faire leurs fonctions. Ceste maladie à cela de propre, qu'incontinent elle ternit le beau teint & couleur loüable de la face, elle remplit tout le corps de phlegme, & le rend tout œdemareux. Celles qui ont ceste maladie sont continuellement agitées de palpitations de cœur, syncopes, de douleurs de teste, de difficulté de respiration; bref leur vie n'est plus qu'une perpetuelle querimonie. La grande diuersité des causes de cette maladie, & le grand nombre des symptomes & accidents qui l'accompagnent la rendent de difficile guérison. Toutefois nous voyons tous les ans, que l'usage de quinze ou vingt iours de ces eaüx, fait ce que plusieurs celebres & experimentez Medecins n'ont quelquefois peu faire avec quantité de remedes facheux.

Qu'on allegue tant qu'on voudra que ie leur attribuë des effets tous diuers & cõ-

traires en apparence. Je respondray qu'il ne faut point dauantage s'alambiquer l'esprit à rechercher la cause des effets si diuers, comme sont ceux qui se rencontrent dans l'vsage desdites eaüs, puis que la raison confirmée par l'experience iournaliere, nous le monstre assez. La peur que i'ay qu'on m'arguë de faire comme les Andabates qui combattoient les yeux fermez, fait que ie confesse ingenuëment, que beaucoup de leurs vertus procedent de leur forme & composition, lesquelles semblent auoir quelque chose d'occulte. D'autant que le grand dictateur *Hypocrate* escrit en mots exprés dans son liure *del'air, des eaux & des lieux*, que toute eau minerale quelle qu'elle soit, deseché plus ou moins. Neátmoins nous voyons tous les iours, que cette eau humecte les vns, & deseché les autres; ce qui se doit attribuer à la maniere speciale du meslange des mineraux, par lesquels elle passe. Platon dans le liure intitulé *Timee*, dit, que la nature a baillé à chascune chose du mode vne pro-

priété spécifique, qui n'a esté donnée qu'à celle là seule, laquelle il appelle celeste, que nous sommes contrains de croire estre en ces eaüis, laquelle communiquée du ciel, luy sert de forme spécifique, suiuite de ses differences, & vertus conformes au mélange qu'elle reçoit, accompagnée de ses accidents, comme saueur, odeur, couleur, & autres, par le moyen desquels elle communique sa faculté & vertu.

Il semble que nos anciens ayent creu quelque chose decela, car ils reueroient grandement ceste Fontaine, qui pour lors faisoit trois boüillons differents & separez, à chascun desquels, ils bailloient vn Sainct tutelaire, sçauoir S. Marceau, S. Liger, & S. Eutrope, à chascun le sien, aux merites desquels ils attribuoient tous ces merueilleux effets. Quoy qu'il en soit, qu'elles agissent par quelque qualité occulte, ou par leur seule qualité manifeste, nous sçauons par experience qu'elles guerissent vn nombre infiny de malades, cõme ceux qui sont dégoustez, ou qui ont
vn ap-

vn appetit dèreglé , ceux qui sont alterez, ou par chaleur excessiue des visceres , ou par impureté d'iceux , ceux qui ont douleur d'estomach , qui ont chaleur de foye, qui ont obstruction au mesenteric, ou autre part , qui ont quelque flux immodéré de ventre, & ceux qui sont subiets aux deuõyements. Elles font mourir les vers, & les chassent dehors, elles arrestét le sang de quelque part qu'il viéne de nostre corps, empeschent la perte de semence inuolontaire, temperent l'ardeur & l'âcrimonie d'vrine , & chassent dehors tout ce qui empesche le flux ordinaire d'icelle , nettoient, & mondifient les vlceres non seulement des reins & de la vescie , mais aussi de toutes les parties de nostre corps , & corroborent la vertu retentrice des reins. Elles sont aussi fort salutaires aux femmes qui ont accoustumé de se blesser, euacuant les mucositez, nettoyant les cotyledons, corroborant les ligaments de la matrice. Elles guerissent la colique humorale, les icteriques, hydropiques, toutes obstru-

ctions de la ratte, elles sont souveraines à ceux qui sont incommodez de veilles, aux suffocations de matrices, & aux femmes qui ne sont bien réglées de leurs purgations, qui ne les ont, ou les ont trop abondamment. En fin elles guerissent tous les mauuais effets qui suivent, les mauuaises constitutions du ventricule, du foye, de la ratte, & autres parties inferieures; comme vertiges; epilepsies, esblouissements, assoupissemens, battemens de cœur, & semblables maladies causées par fumées & exhalaisons.

Nous n'approuuons pas l'usage desdites eaüs pour ceux qui ont quelque affection de poictrine, tant à cause de leur froideur actuelle que de leur adstriction. Toutesfois il y a quinze ans ou enuiron, que deffunct Monsieur Brisson, Medecin fort celebre, & moy, ne fumes d'aduis de premier abord, qu'une honneste Dame de Moulins en Bourbonnois beut desdites eaüs, pour cause qu'elle estoit toute tabide & atrophiee, qu'elle auoit fluxion

sur la poictrine, avec toux seche, difficulté de respirer, & rougeur de jouës. Neantmoins elle se delibera d'en boire cinq ou six iours par essay, lesquelles rendant par les dejections & par les vrines sans incommodité, continua (nous y inclinans à cause de l'alegement quelle en receuoit) & en beut vingt cinq iours, avec heureux succez & guérison.

Il y en a eu qui ont creu n'estre besoin de se preparer par aucun purgatif auparavant, ny apres l'vsage desdites eaüs, disants, que si les purgatifs estoient absolument necessaires auparavant que de boire desdites eaüs, & apres les auoir beuës, on ne verroit tant de pauures releuez de grandes & deplorées maladies, lesquels pour l'ordinaire n'vsent d'aucuns purgatifs. Ausquels ie responds avec Celse, que encores que la temerité ait esté quelquefois (par rencontre) vtile & profitable à quelques-vns, neantmoins que pour ce il ne faut negliger de se seruir avec prudence des choses, qui nous aydent à paruenir

plus commodément au but de nos intentions. L'experience nous fait voir à l'œil, qu'il y en a beaucoup plus de ceux, qui bien & deuëment preparez à l'vsage desdites eaüs reçoient accomplissement de leurs desirs, que de ceux lesquels imprudemment remplis d'une infinité d'humeurs cacochymes, s'y iettent sans aucuns preparatifs. Ne seroit-ce pas vn signe de folie de vouloir mettre, & conseruer de l'eau pure & netre dans vn vaisseau, si auparavant on n'auoit mis hors l'impureté, qui pourroit estre en iceluy? Il sera permis de faire le mesme iugement de celuy, qui voudroit vser desdites eaüs avec vne impureté d'humeurs, qui d'ordinaire accompagne ceux qui ont besoin d'en boire.

Le corps estant bien prepare on pourra commencer à boire de ladite eau au temps quelle est salubre, qui est depuis le quinzième Iuin, iusques à la fin de Septembre, le tout selon la disposition & chaleur des années, laquelle commence, continuë, & finit ores plustost quelques-

fois plus tard . Non que ie vueille dire, qu'il n'en faille iamais vser qu'en ce fufdît temps, dautant que nous sommes quelquefois contrainsts d'en faire boire l'hyuer pour des ardeurs, & retentions d'vrine, laquelle pour cet effet nous faisons tiedir dans des bouteilles bien bouchées.

L'heure de boire est le matin, à cause que l'air est mieux épuré des vapeurs & humiditez de la nuit, par les rayons du soleil, Que les pores de la terre ayants esté resserrez par cette fraischeur, ont retenu & conserué les esprits acides, desquels les eaüs tirent toute leur force & vertu; Que la nature ayant aussi ramassé ses esprits par le sommeil est plus robuste & vigoureuse pour prendre lescdites eaüs, & en faire son proffit, & en somme qu'en l'esté, auquel on a coustume d'en boire, la matinée est la partie du iour la plus temperée & la plus commode.

Ladite eau est meilleure à boire sur le lieu que trāsportée, dautant qu'elle perd tousiours quelque chose de son esprit mi-

neral, qui est fort subtil. Toutesfois nous pouuons asseurer qu'il n'y a eau minerale en France, qui se conserue mieux & plus long-temps qu'elle, avec sa saueur, odeur, & proprieté, les bouteilles estants remplies & bouchees avec soin, & comme il faut dans la Fontaine: En quoy elle paroist auoir quelque chose de plus special que les autres eaus minerales de France.

Quant à la dose & quantité, encores qu'il la faille mesurer, & doser aux forces de l'estomach, & en faire boire plus aux vns, moins aux autres, le tout par l'aduis d'un Medecin, qui cognoissant la qualité de ladite eau, la proportionnera avec le temperament de celuy qui la doit boire. Neantmoins ie puis dire, ce que nous pratiquons d'ordinaire, qui est que nous faisons boire, depuis trente deux ou quarante onces inclus, iusques à quatre-vingt ou cent, plusieurs passent par delà, mais ie ne l'approuue pas à tous.

L'ordre de boire est, qu'estant leué & s'estant présenté à la selle, on essaye de se

nettoyer par tous les emunctoires , afin que le corps deschargé des excrements, qui luy estoient vn pesant fardeau, reçoive plus facilement l'vtilité qu'il en espere. Apres il faudra aller à la Fontaine, commencer à boire à six heures du matin au mois de Iuin, & de Septembre , & aux mois de Iuillet, & d'Aoust à cinq heures & demie. Et pour accoustumer le ventricule à ceste boisson , on n'en prendra que trente deux onces le premier iour en quatre fois, sçauoir deux verres de huiët onces chascun , avec peu d'interualle entre deux. Par apres on prendra vne cuillerée d'anis confit, fenoil, ou canelat de Milan , & on fera sept ou huiët petits tours de promenade dans le circuit de la Fontaine , pour retourner encores en prendre deux autres , avec autant d'anis, ou de canelat. Le second iour on en prendra six, à la mesme maniere que les premiers, en continuant iusques au nombre de dix ou douze (de iour à autre augmentant de deux) : où l'on demeurera pour en boire

quinze ou vingt iours, selon qu'il sera ordonné par le Medecin, pour apres les quitter, en diminuant de deux en deux verres, comme on aura commencé.

Après qu'on aura acheué de boire ce qui sera designé, il se faudra promener fort moderément, & sans violence, spécialement ceux qui suent facilement, lesquels ne se promeneront que fort peu, & encores en lieu couuert. Dautant que pour retirer vn plus grand profit de l'vsage desdites eaüis, il les faut rendre par les vrines, & par les dejections. Ce qui est empesché par les sueurs, lesquelles eschaufant constipent, & destournent l'eau du foye, & des reins, pour l'enuoyer à la circóference.

Entre toutes les choses qu'il faut observer en beuuant lesdites eaus, le regime de viure tient le premier rang, & contre lequel il fait le plus dangereux faillir. Dautant que la conseruation de nostre vie, est toute mise & colloquée dans là maniere de viure, laquelle doit estre en ceste sorte, sçauoir, qu'il ne faut faire que deux repas
le iou,

le iour, dîner & soupper. Le dîner doit estre après qu'on aura rendu les eaus, ou par les dejections, ou par les vrines, ce qui est fait dans quatre heures ou environ, & lors quelles commencent à se changer, & d'acqueuses deuenir citrines. Le soupper à cinq heures & demie ou à six. Que si d'auenture quelqu'un auoit soif entre lesdits repas, ce qui n'arriue gueres, il pourra manger quelques raisins damas, vn macaron, ou vn morceau de biscuit, pour boire vn peu de vin bien trempé.

Encores que lesdites eaus baillent vn grand appetit, si faut-il se donner garde de ne s'y poinct laisser emporter, estant l'une des principales maximes en ce lieu, qu'il y faut sortir de table avec appetit. Sur-ce il se peut mouuoir vn different, sçauoir, s'il est plus expedient durant l'usage desdites eaus, de mieux dîner que de soupper, ou au contraire. Plusieurs croient qu'il est plus à propos de mieux dîner

que de soupper. Toutefois la raison nous enseigne & l'experience nous monstre, qu'il est plus vtile & plus seur, de donner quelque chose de plus au soupper qu'au disner, le tout sans excès. Car qui ne void que la distention causée par la quantité d'eau de biffe, & rabat grandement la vertu concoctrice de l'estomach pour quelque temps, & par consequent le rend inhabile, & incapable à porter beaucoup de nourriture & moins la pouuoir digerer, comme il est expedient? Et ne faut craindre que ceste façon plus libre de soupper; empesche de boire le matin à l'accoustumée, dautant que la promenade de l'apres souppé, & le grand temps qu'il y a du soir au matin, sont suffisants de faire la digestion requise, & rendre les conduits & meats assez libres, pour retourner le lendemain matin à l'usage de ladite eau.

A l'entrée du disner on prendra vn boüillon fait avec chairs de mouton, de veau, & de volaille, alterez de quelques

feuilles d'oseille , pimpinelle & laiçtuë. On n'vsera que de viandes de bon suc, & de facile digestion , comme de vcaus, de moutons, d'aigneaux, chapons, poulets, pigeonneaux, cailles, perdreaux, œufs frais, l'vfrage des poissons n'est pas trop conuenable. Toutefois on pourra vser de la perche, du brochet, & des poissons saxatiles, comme de la loche, & de la truite. Lesdites viandes se mangeront rosties au soupper, & au disner indifferemment, bouillies ou rosties. On évitera toute viande de mauuais suc, & de difficile digestion, comme sont les chairs de porc, de bœuf, de venaisons, laiçtages, fromages, legumes, febues, pois, salades, espiceries, saleures, fricassées & autres.

Le pain sera de froment pur, bien pestrý, & cuiçt comme il faut.

Le vin sera de mediocre substance, plaisant à boire, ne sera fumeux, ny desagreable au goust, & sera mediocrement trempé.

Or d'autant que le regime de viure ne comprend pas seulement en soy le boire & le manger, mais aussi toutes les choses, sans lesquelles en viuant le corps ne peut subsister, qui sont l'air, le sommeil, la veille, le mouuement, le repos, les excretions, retentions, & passions de l'ame, desquelles choses si nous deuons vsr en aucun lieu, & temps, avec soing & vigilance, ce doit estre specialement lors que nous prenons lesdites caüs, tant pour n'estre frustré du bien pretendu, & esperé par ledit vsage, que pour éuiter les incommoditez qu'encourent ceux qui en mesvsent.

L'air qui nous entoure a vn grand pouuoir sur nous, & par le dedans, & par le dehors. Tellement que nous auons grand interest de l'éuiter, nó seulement quand il ya quelque corruption, mais aussi à certaines heures du iour: comme quand il fait grandement chaud, ou grandement froid, ou que ledit air est agité de vents, & specialement quand on boit desdites

caus , se fault garder soigneusement du
fercin .

Mais il est à craindre que desirants éui-
ter l'air agité des vents, ou eschauffé par les
rayons du soleil , nous ne tombions dans
le sommeil du iour , qui suit pour l'ordi-
naire le repos de l'apres disnée , de mesme
façon, que l'ombre suit le corps, lequel ce-
pendant il faut éviter avec plus de precau-
tion , & vigilance qu'on ne fait la caute-
leuse melodie des Syrenes. Car le sommeil
qui se prend de iour est le plus grand ty-
ran de nostre corps , qui (par son charme)
apres nous auoir suscité vn nombre infi-
ny de maladies , en fin nous precipite à la
mort .

Le dormir de iour nous est nuisible,
pour deux raisons , l'vne qu'il empesche
les opérations esperées par l'usage de ladi-
te eau , ou pour mieux dire , de la nature.
Car guerir les maladies , éuacuer les excre-
ments, separer les mauuaises humeurs d'a-
ueccles bonnes, ce n'est pas l'effet de ladicte

eau, ny du Medecin , mais de la nature , de laquelle il n'est qu'instrument.

L'autre cause est , que ledit sommeil n'est naturel, mais qu'il est excité par les vapeurs crasses & feculentes du mineral imprimé dans ladite eau, Il faut donc conclure que tout sommeil immodéré, & pris hors du temps destiné (qui est la nuit) est nuisible. Pour lequel éviter il y a deux moyens. L'un desquels est (comme nous auons dit cy-dessus) d'estre vn peu sobre à son disner, & en retrancher quelque chose; d'autant que l'aliment est la cause materielle du sommeil, qui est augmenté ou diminué selon le plus ou moins qu'on en prend.

L'autre moyen est, qu'il est bon de faire quelque exercice médiocre, afin de dissiper la cause materielle dudit sommeil, par la commotion du corps, & d'éuacuer les restats des caüs minerales, qui pour l'ordinaire remplissants le cerueau de vapeurs excitent le sommeil de l'apres disnée.

Que si ceux qui veulent boire desdites caüs sont si foibles & imbecilles, comme il arriue quelquefois, specialement aux paralytiques, & autres infirmes semblables, qu'ils ne puissent faire aucun exercice, il sera besoin qu'ils vsent souuent de remedes euacuatifs, afin que tous les iours ils se nettoient, tant par les dejections & vrines, que par les insensibles transpirations du corps.

Il y en a d'autres tellement constipez, qu'encores qu'ils beuent quantité de la dite eau, neantmoins ne peuuent estre esmeus, que par l'vsage de quelque remede qu'on leur fait prendre auparauant que de boire.

Quant aux passions del'ame, nous pouons dire assurement, qu'elles regissent nos corps, de mesme façon que le nauonnier gouerne le nauire. C'est pourquoy il faut auoir vn grand soing, de si bien composer nos mœurs, qu'elles ne nous puissent endommager en aucune fa-

çon. Car la tristesse, la cholere, la melancholie, la sollicitude déreglée des affaires, & autres passions, comme l'amour, & mesmel'vſage des choses licites du mariage, tandis qu'on boit, nous empeschent de retirer non seulement l'vtilité esperée, par l'vſage desdites caüs, mais aussi espuisent, & troublent nos esprits, desechent nostre cerueau, affoiblissent nos sens, & dissipent tellement nostre chaleur naturelle, & humeur radicale, quelles engendrent en nous vne pepiniere de maladies.

Or d'autant que lesdites caüs laissent beaucoup d'excrements apres soy, qui pourroient peut-estre causer quelques incommoditez, il faudra se purger apres l'vſage de ladite eau, avec de la manne de Calabre dans vn boüillon, y adioustant quelquefois, s'il est besoin, de l'Electuaire de citro, le tout suiuant l'aduis d'un Medecin, qui sera bien informé de la disposition & forces du malade, qui cognoi-

ſtra la

stra la qualité de ladite eau, & lequel au prealable, aura particularisé non seulement le regime de viure, mais aussi la façon d'yser de ladite eau, quand il en faut prendre, & combien.

Voila ce que j'ay creu deuoir escrire de l'origine, source, propriété, & effets de ladite Fontaine minerale de Pougues, avec le regime en general qu'il y faut tenir en beuant. Le tout en termes les plus familiers que j'ay peu choisir, pour estre entendus par toutes sortes de gens qui beuent desdites eaus, tant sur le lieu, que transportées au loing. Ausquels ie donneray vn mot d'aduis, qu'ils ayent à se donner garde des tromperies de certains voïcturiers, desquels les vns remplissent des barriques de ladite eau, & la mettent lors qu'ils sont proches de leur lieu dans des bouteilles, qu'ils bouchent le mieux qu'il leur est possible, pour faire croire qu'ils les ont apportées de Pougues en ceste maniere. Les autres rencontrans quel-

ques vnes de leurs bouteilles cassées, de peur de perdre leur voïcture, d'une ils en font deux, qu'ils acheuent de remplir d'eau commune, au grand detrimement du public. D'autant que les bouteilles doivent estre remplies en beau temps, au boüillon de la source, & bouchées deliege, auant qu'elles soient tirées hors de l'eau, & puis apres enuironnées, & enduites de cire & resine, & par dessus de cuir, afin de conseruer la vertu de ladite eau, contenuë dans toutes les parties.

De ces abus, & plusieurs autres qui se commettent par lesdits voïcturiers, sont faites plaintes de toutes parts, & mesme quelques-vns apres en auoir esté punis & chastiez par amandes dans Orleans, sont neantmoins retombez en mesme faute. Ce qui a donné sujet au Roy, de commander (sur l'aduis que luy a donné Monsieur Bouuard son Conseiller en ses Conseils d'Estat & Priué, son premier Medecin, & Surintendant general des

eaüs minerales de France) que par cy apres les bouteilles, dans lesquelles on transporteroit lescdites eaüs, fussent cache-
tées de cire rouge. Pour lequel comman-
dement executer, il fut donné commif-
fió, *le vingt sixiesme iour d' Aoust mil six cens
trente deux*, qui fut publiée, afin de de-
stourner la tromperie desdits voicturiers,
& que les eaüs estants portées fidelement,
les malades puissent iouir des dons, & gra-
ces speciales que Dieu leur a departies.

F I N. .